

Desde 1854 Aruba ta Hulandes, resorta bao Corsow

Skirbi pa: Atan Lee Sr.

Tur esnan cu ta grita cu nan no kier bay bao di Hulanda ta asina mente chikito cu nan no ta realiza cu semper nos ta bao Hulanda, cu nos ta Hulandes cu un pasaporte igual cu tur Hulandesnan Europeo, nos tin un Paspoort Hulandes Europeo.

Kico tin hende ta kere cu ora cu Aruba a haya su Status Aparte cu nos a bay para completamente riba nos pianan, no nos a sali for di e constelacion Antiyano, for di dominio di Curaçao, pero kedando den Reino, perteneciendo na Hulanda, manteniendo nos paspoort Hulandes Europeo cu tin un balor valioso pa nos tur como Arubianonan,

Na november 2006 tabata tin un referendum den Antiyanan Hulandes, na unda e islanan por a escohe entre 4 alternativa: (1) Bira independiente, (2) Un status aparte, (3) Un gemeente of (4) keda manera e tabata ta, esta un Antiyas di 5.

No a keda Bonaire nada otro pa escohe pa bira un gemeente si e no kier keda bow dominio di Curaçao. Bonaire tambe tin su historia, na prome lugar nan no a conoce e desaroyo cu Aruba y Curaçao a conoce, esta un refineria y despues turismo. Bonaire practicamente no tabata tin un actividad economico potencial. Riba dje mescos cu na Aruba, Bonaire a conoce un cantidad di politiconan corrupto y hasta tin cu a bay sera. Nunca Bonaire tabata conoce un Gobierno stabil, semper e ta cay na caminda o tabata tin eleccion, esaki a sosode te hasta despues cu nan a bira un gemeente.

Pueblo di Bonaire a vota masal pa un gemeente y hasta prome cu realisacion di esaki, e partido cu a gana eleccion a organiza otro referendum y pueblo a bolbe vota pa bira un gemeente. Cu otro palabra Hulanda no a forza nan pa bira un gemeente, den dos referendum nan mes a scohe pa esey.

Otro escogencia nan no tin tampoco, tumando na consideracion cu economicamente nan no por a para nunca ariba nan pia. Bonaire tabata tin otro problema cu nan no tin nan mes un moneda y hunto cu e politiconan Bonaireano a dicidi hunto cu Hulanda pa haci Dollar nan moneda oficial. Nan mester a bay costumbra di biba cu e cambio aki, Cu nan mes a escohe dos biaha pe.


Mi ta corda cu tabata tin un politico Arubiano di MEP bon conoce cu a ocupa posicion ministerial a bay campaña pa Bonaire bira independiente, loke te ainda ta su deseo pa Aruba tambe haci, esta bira independiente. Hasta un ex-Prome Minister siman pasa a declara cu mihor muri riba pia cu na rudia dilanti Hulanda, palabranan cu semper a ser usa pa paisnan cu ta desea independencia, nan tur dos tin influencia den MEP.

Pueblo mi pregunta na boso ta: Boso kier bira independiente y perde nos paspoort Hulandes Europeo? Laga esunnan di MEP bin declara cu nan no ta para tras di e expresionnan aki. Ayera mi a ser yama pa varios hende di Bonaire mes y hasta politico, cu nan ta contento cu e desaroyo cu Bonaire a conoce, bon caretera, bunita hospital, scolnan nobo cu un enseñansa riba un nivel sumamente haltu, tur cos pa loke ta trata seguridad, nan tin polisnan Hulandes, cu ekiponan sumamente moderno. E pobreza awe cu Aruba conoce, nan no conoce, debi cu Hulanda ta sigui yuda nan den tur cos y nan tin tur derechonan mescos cu cualkier Hulandes.

Kico a resta di nos Status Aparte? Un skelet abusa door di haraganan.

Pueblo mester realiza cu apesar cu Aruba tin su Status Aparte, ta Hulanda ta maneha tur asunto riba tereno Internacional, defensa, diplomacia etc. Ta Hulanda mester bay di acuerdo pa Aruba haci prestamo Internacionalmente, loke nan a bin ta haciendo desde cu Aruba a haya su Status Aparte, fia placa pa cubri e deficit den presupuesto di nos pais.

Ta 6 aña pasa cu Gobierno Hulandes a forza Aruba pa aproba un ley den Staten pa Aruba permiti Hulanda controla e finanzas di nos pais completamente, Di eynan a nace CAft. Pakico, pasobra Hulanda kier a para e deroche di placa, mal gastamento di placa cu ta tumando lugar despues di nos Status Aparte, politiconan cu pensioennan di 20.000,



30.000, 40.000, 50.000 y hasta mas cu esey pa luna, pueblo pa luna, Overbruggingstoelage cada cu Gobierno cambia pa tanto parlamentari-onan y ministronan cu den transcurso di añanan a acumula na miyones, y miyones di Florin, Nos tin hopi miyonario ariba nos pais cu placa di pueblo. E abuso aki pueblo kier pa sigui tuma lugar? Mi ta corda e dia cu a pasa e ley pa bin CAft, nos actual Prome Ministro a hiba palabra y insulta Mike Eman pa traidor door cu e a bende nos Status Aparte. Loke ta berdad, debi cu ki bal bo tin un Status Aparte y ta Hulanda, mirando e abusonnan cu tabata tumando lugar, ta dicidi con nos mes mester traha y maneha nos finanzas publico. Un pais liber sin por para ariba su financieramente, ta un pais cu no tin un Status Aparte.

Pueblo cu virus aki nos debe nacional lo monta segun experto cu mi a papia cune den e dianan aki na 4.5 biyon, e ta algo desastroso pa un pais chikito cu no tin un entrada fiho, pero ta depende di turismo, un economia hopi debil y insegur. Actualmente ken ta yudando Aruba pe sobrevivi? Nos madre patria cu desde 1854 nos ta pertenece na dje. danki Dios cu nan ta un di e paisnan mas rico den mundo, sino ta con?

Mientras cu politiconan a sigui goza nos pueblo a sigui bira mas pover, hopi pover, famianan bibando sin luz, sin awa, sin cuminda. Muchanan chikito ta bay school sin baña, cu hamber na stoma, Hesus a bisa converti bo mes manera un mucha lo bo drenta Reino di Cielo, hopi lo no drenta pa e abuso grandi cu nan ta haciendo cu nos criaturanan, Hendenan para den rij pa busca cuminda, dolor na mi corazon mi ta skirbi esaki, debi cu mi señora, mi mes y mi yiunan, ta purba yuda unda cu nos por pa sikiera e pobernan tin un cuminda ariba mesa, sikiera un cuminda mi ta ripiti, pasobra no tin mas. Aruba ta pover y lo bira peor den e lunanan nos dilanti.

Loke ta un "gemeente":

Pueblo cada 4 aña ta vota pa scohe esnan cu lo bay representa nos, na Bonaire nan a mantene diputadonan, aki nos por keda cu e Parlamento, lo bay tin un gezaghebber cu lo dirigi e Gobierno.

Nos ta keda cu nos bandera, himno y moneda y si turismo recupera, cu un bon maneho nos ni mester di Hulanda financieramente. Hulanda lo sigui controla e finanzas di nos pais, loke ya e ta haciendo caba. Simplemente nos Status Aparte, lo bira un gemeente, na unda nos lo bay goza di tur privilegionan cu un Hulandes Europeo tin. Encuanto hisa belasting, esey ta keda pa e gemeente dicidi, google y lesa e leynan pa un gemeente, Tur buelonan for di Hulanda y Europa lo bira buelonan Nacional, mescos cu nos tin cu Merca awor,

Tur cu ta insulta mi manda mi bay biba na China of Hulanda ta estilo di Mepistanan raha cu ta bin cu insultonan anticua y bao nivel. Un cos mi por bisa cu mi ta un Arubiano, yiu di un mama fam Geerman di Santa Cruz, di un tata Chines cu mi ta orguyoso di dje. Un Arubiano orguyoso di por bati riba mi pecho cu semper mi a haci hopi, pero hopi trabaonan boluntario, for di mi 13 aña di edad te ainda. Te ainda mi ta yuda unda cu mi por, pasobra esey ta den mi sanger, yuda hende, haci trabao boluntario. No tin un hende riba e pais cu por bisa cu Atan sr. por a nenga nan un consejo, mi cas tabata y ta semper habri pa mi pueblo, ta mi pueblo a haci mi e persona cu awe mi ta. Mi humildad mi ta muri cune, na semper respet, balor y norma ta bin na prome lugar.

Mi kier a gradici tur e e-mailnan cu mi a ricibi, yamada, message, Whatsapp cu mi a ricibi, ofreciendo nan apoyo y ta cla pa yuda. Tin profesionalnan conoci y studia den nos comunidad cu ta trahando riba e referendum y ta cla pa yuda pa caba y salba loke ainda por salba. Ya nos por conta ariba 1.000 firma.

Cu hobennan bon studia nos por cambia e rumbo di nos pais, nos cu ancianonan cu pensiunnan haltu ainda ta bin gana 25.000 pa luna. Nos hobennan ta inteligente y nos por tin confianza den nan.

Mi ta gradici Dios cu e a duna mi e inteligencia pa asina mi por habri wowo di nos pueblo, sin miedo di criticanan baho y vil, pa termina cu e bagamunderia cu a tuma lugar despues di e status aparte di nos pais.

Mi ta orguyoso di mi paspoort Hulandes Europeo y hopi ta pensa mescos cu mi.

Mi ta desea di aclarea cu esaki no tin nada di haci cu Partido Raiz, pero te ainda ta un lucha di Atan Lee Sr, boso humilde sirbido cu ta reza y stima boso hopi. hunto nos lo vence y garantiza Aruba un gran futuro pa nos criaturanan, kendenan awe tin un debi di 4.5 biyon riba nan cabez y ainda e virus no a pasa.